

# Nozibele le Meriri e Meraro

Tessa Welch  
Sepedi





Kgale, kgale basetsana ba bararo ba ile  
ba sepela go ya go rwalela dikgong.

Letšatši le be le fiša tšhiri tšhiri, gomme  
ba ya nokeng go ya go rutha.  
Ba ile ba raloka ga monate , ba gašana  
ka meetse mola ba rutha ka meetseng.





Ge ba re phaphara!, ba lemoga gore  
ešetše e le bošego.  
Ba sepela ba boela motsaneng.

Ge ba le kgaufši le gae , Nozibele a swara molala wa gagwe.

A lemoga go re o lebetše pheta ya gagwe.

“A re boeleng morago , ke a le kgopela hle.”

Nozibele o ithapeletša go bagwera ba gagwe.

Eupša bagwera ba gana ba re e šetše e le bošego.





Nozibele a boela morago nokeng a nnoši. O ile a hwetša pheta ya gagwe a boela gae ka pela.  
Ka ge e be e šetše e le bošego, go be go le lefsifsi, o ile a timelelwa ke tsela ya go ya gae.



A sa le kgojana a bona go tuka lebone  
ngwakong o mongwe.  
O ile a phakišetša gona, a batamela  
mojako a kokota.





O ile a makala ge mpša e le yona ye bulago mojako.

“O nyaka eng”? Gwa botšiša mpša.

“Ke timetše gomme ke nyaka lefelo la go robala.” Gwa realo Nozibele.

“Tsena, e se go bjalo ke tla go ja.” Gwa realo mpša.



Mpša ya re go Nozibele, “Nkapeele dijo”  
“Eupša ga sa ka ka apeela mpša dijo.”  
Gwa araba Nozibele.  
“Apea, go se go bjalo ke tla go loma.”  
Gwa realo mpša.  
Nozibele a apeela mpša dijo.





Gomme mpša ya re “ Ntukišetše malao”.  
Nozibele a araba a re “Ga sa ka ka  
lokišetša mpša malao”  
“Ntukišetše malao, go se go bjalo ke tla  
go ja”, gwa realo mpša.  
Nozibele a lokišetša mpša malao.



Ka mehla , Nozibele o be a swanetšwe ke go swiela , go apea le go hlatšwetša mpša.

Ka letšatši le lengwe mpša ya re “ Nozibele, lehono ke swanetše go etela bagwera ba bangwe ba ka.

“Ka moo o swiele ntlo, o apee dijo. O hlatšwe dilo tša ka pele ke boa”.

Ge mpša e fetša go tloga, Nozibele a  
ntšha meriri e meraro mo hlogong ya  
gagwe.  
O ile a bea moriri o mo tee ka fase ga  
mpete.  
O mong a o bea ka morago ga mojako.  
Gomme o mong a o bea ka lešakeng.  
Gomme a kitimela gae ka lebelo le  
legolo.





Ge mpša e fihla gae, e ile ya nyaka Nozibele.

“Nozibele o mo kae?” gwa goelela mpša.  
“Ke nna ye ka fase ga mpete” gwa araba moriri wa mathomo.

“Nozibele o mo kae?” gwa goelela mšpa.  
“Ke nna ye ka morago ga mojako,” gwa araba moriri wa boraro.

“Nozibele o mo kae?”, gwa goelela mpša.  
“Ke nna ye ka lešakeng,” gwa araba moriri wa boraro.

Gomme mpša ya tseba ge Nozibele a mo  
diredše makatika.

Gomme ya kitima ka lebelo nako e telele  
go ya motseng.

Ge e fihla gabo Nozibele ya hwetša bo  
butiagwe ba e letetše ka dikgati tše kgolo  
E rile ge e bona gore go hlafile, ya tšhaba  
e sa lebelele morago. Ya ba ge e le la  
mafelelo mpša e bonwa.






# Nozibele le Meriri e Meraro

Writer: Tessa Welch

Illustration: Wiehan de Jager

Translated By: Maphokane Mapule Mohlamme

Language: Sepedi



© African Storybook Initiative, 2014 , 2014



This work is licensed under a Creative Commons Attribution  
(CC-BY) Version 3.0 Unported Licence

Disclaimer: You are free to download, copy, translate or adapt this story and use the illustrations as long as you attribute or credit the original author/s and illustrator/s.

**Saide**   
South African Institute  
for Distance Education

[www.africanstorybook.org](http://www.africanstorybook.org)  
A Saide Initiative